

Thaum Yexus Khetos tus uas yog nej txojhia rov qab los, nej yeej yuav nrog nws ua ke los, thiab nrog nws tau ntsejmuag ib yam nkaus.

Qhov uas tseemceeb dua ntais tej ntawd huv tibi, nej ib tug yuav tsum hlub ib tug tiag tiag. Nej thiaj yuav nyob taus ua ke.

Nej yuav tsum cia Yexus Khetos tus uas ua tau rau neeg nyob sib haumxeeb kav tagrho nej lub siab, rau qhov tus Vajtswv uas xaiv nej los koom ua ib lub cev, nws yeej xav kom nej nyob sib haumxeeb. Nej yuav tsum nco ntsoov Vajtswv tshavntuj.

Nej yuav tsum khaws Yexus Khetos tej lus huv tibi cia rau hauv nej lub siab. Nej ib leeg yuav tsum ua tib zoo siv tswvim qhia ib leeg, thiab ib leeg ntuas ib leeg.

Thaum nej hu nkauj tsis hais tej nkauj qhuas Vajtswv, tej nkauj hais txog Yexus zaj, tej nkauj uas Vajtswv tus Ntsujplig tshoov neeg lub siab sau, nej yuav tsum zoo siab hlo ua Vajtswv tsaug. Ib puas tsav yam uas nej ua los yog, nej hais los yog. Nej yuav tsum ua kom tsimnyog qhov uas nej yog cov ntseeg tus Tswv Yexus. Nej cov uas Yexus twb cawm lawm, nej cia li ua tus Vajtswv uas yog peb Leejtxiv tsaug. (Khaulauxais 3:1-4, 14-17)

381

TSO KEV TXHAUM TSEG LOS NTSEEG YEXUS

Petus teb lawv hais tias, nej txhua tus nyias yuav tsum tso nyias tej kev txhaum tseg, thiab ua kevcai raus dej kom sawvdaws pom hais tias, nej yog cov ntseeg Yexus Khetos. Vajtswv yuav zam nej lub txim thiab pub Vajtswv tus Ntsujplig rau nej.

Rau qhov Vajtswv cog lus tseg hais tias, Vajtswv yuav pub nws tus Ntsujplig rau nej cov xeebntxwv, thiab rau cov neeg uas nyob deb txhua tus uas Vajtswv xaiv los ua Vajtswv haivneeg.

Petus ntuas lawv heev heev ntxiv hais tias, nej yuav tsum nrhiav kev khiav kom nej tsis txhob raug txim li cov neeg phem no. Tej neeg uas nloog Petus qhia, muaj ntau leej ntseeg tej lus uas Petus hais, thiab ua kevcai raus dej. Hnub ntawd cov neeg los ntseeg tshiab, yuav luag muaj peb txhiab leej.

Lawv niajnub tuaj kawm tej uas cov tubtxib qhia. Lawv sib raug zoo. Lawv tuaj noj mov ua ke, lawv koom noj Yexus rooj mov thiab thov Vajtswv.

Thaum sawvdaws pom tej txujci loj thiab tseemceeb uas cov tubtxib ua, lawv xav tsis thoob li. Cov ntseeg ua ib lub siab nyias taus nyias nqa nyias tej qhov txhiachaw tuaj sib pab. Lawv nyias muab nyias tej liaj tej teb, thiab tej qhov txhiachaw muag, thiab muab tej nyiaj ntawd tuaj faib rau sawvdaws raws li tus uas muaj chaw siv.

Lawv niajnub mus nyob ua ke nloog lus qhuabqhia hauv lub Tuamtsev. Lawv mus noj Yexus rooj mov thiab noj mov ua ke hauv lawv tej tsev ib lub dhau ib lub, txawm yog muaj ntau muaj tsawg los, lawv sawvdaws zoo siab noj.